

四庫全書

集部

欽定四庫全書

集部

弇州四部稿卷二十三
四

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官檢討_臣慮應

謄錄監生_臣閔思紀

欽定四庫全書

弇州四部稿卷二十三

明 王世貞 撰

詩部

五言律一百二十二首

俠客

幸舍新彈鋏屠家舊鼓刀
風塵看不見意氣為誰高
片語忽生翼此身如拔毛
金張貴人里辟易鷗鷺袍

丁未計偕將出門夕

此夜不忍旦匆匆垂去家回看小弱女猶未解呼爺凍
雪依簷草輕颺散燭花莫揮分手淚吾道自天涯

歸舟風雨

短笛破空濛孤舟黯淡中打蓬霞脚雨鬪水石尤風少
住投棲鳥無言數去鴻酒杯吾計在未擬哭途窮

放舟

偶然走馬去忽復放舟歸倒日魴鯉集長天鸛鶴飛釣

童竹枝曲浣女藕花衣莫作它鄉樂江南春漸稀

大行方皇后輓歌二章

葆性專坤靜論功夾日明恩將貫魚重身為當熊輕寂
寂春金屋沈沈夜玉城不須彤史述天語自崢嶸

其二

密雨椒途淨傷雲鷺輅興深宮六衣捲導扇五華層仙
馭何其杳神君不可憑還應從此日起觀望昭陵

雪後入臨大行皇后

振木長飈勁迴空霽雪明河山俄改色
天地有悲聲苑樹連枝淚宮鴉數點晴
此時仙馭遠知復盼瑤京

其二

積雪映空明輕寒入帝城
蓋珠飄榭冷粧粉委塵輕
玉履惟傳跡瑤臺何處行
梅花與柳絮知是總傷情

出塞二首

鞞鼓胡雲舊旌旗漢月新
何來飛虎將親獲射雕人
白髮尋源早黃金結俠貧
功成不望賞雲閣畫麒麟

其二

不斷穹廬色檀槽壓酪漿俄聞五校至去逐六羸亡蒲
類天如赭燕支月似霜前軍又鐃吹生得左賢王

游天寧寺莫膳部偶過有作

駐馬扶游興招提背郭開祇堪吾暫憩不謂爾能來香
飯青陳供輕衫白氎裁宿鴉千佛子就掌莫驚猜

天寧寺大風雨旋霽

鴈塔衝颼勁珠林密雨迴曇花室外散天樂定中來龍

出阿羅鉢貍翻般若臺何因占慧力孤月亂雲開

游白雲觀遇鍾了髻

行散到古院翛然遇真師落日澹眉宇清霜踈髮絲飯
溫初煮石丹冷舊封泥嗒坐渾無語蟬聲秋樹枝

暮秋

十日不啟戶秋容老自催雨蟲寒上壁風葉夜侵苔藥
裹收仍展砧聲去復來乾坤空濶意不為庾生哀

十六夜月不寐

瑤鏡破踈枝西風散夕帷流光豈不惜圓景漸成虧脉脉憑誰語娟娟靜自窺故鄉俱一點含意暫教遲

十七夜月獨坐

有恨光難滿多愁掛却遲淒涼洞庭樹迢遞上林枝故苑空機杼深宮罷履綦鴈風團白露愁殺獨棲時

送王僉事先生罷官歸

毋驚送君出直道邇難任詎是無知己翻然諧素心浮雲看逝鳥幽谷寫鳴琴亦有臨岐淚蒼生望轉深

其二

清秋愴行役況子罷官歸落日芬蘭珮西風涼芟衣遲
遲為帝里欵欵向親闈更薄湘繫怨孤臣托罪微

奉寄華學士先生

共識承恩日為郎曲石渠未須論失馬已是遂焚魚小
徑頻回駕青山獨著書無言同咄咄有夢亦蘧蘧

其二

軒冕豈不羨難膺千載軀獨游成遠志新論擬潛夫世

路知相左吾師亦太迂野鷗今不忌隨意釣江湖

其三

自愛青山地毋嗟上苑枝我方占世道天欲重公詩往
事浮雲逝生涯流水知獨慚門下客悽斷馬融帷

元日日有食之雨不見

日蝕王正朔千山一雨蒙人間今不見天上豈應同漢
署慚宣疏

鮑宣有元
旦日蝕疏

堯都想羿弓向來聞左史曾紀善

言功

春日過李三于鱗小飲適謝茂秦至有懷伯承明府

乘興欵柴扉相逢騎馬歸待予初下榻對爾欲忘機好客語中至情人書後稀悠然念離合徙倚度斜暉

有懷伯承因荅于鱗

自聞仙令去春雪下江關予以友生感君其伯仲間援琴對素月流思共高山賴有投珠意索居時解顏

荅贈于鱗

歷下多奇士夫君無忝之身應李白後書是伏生遺古
調名堪小窮探已亦疑書來重噓借吾更愛吾詩

玩小池金魚

寂爾空庭步悠然涼意新倒池明綠樹驚藻愛朱鱗聚
沫緣窺食穿深欲避人不知濠上樂魚我竟誰真

乍雨

細雨留高樹輕寒過小池劇憐初夏節却似晚秋時披
符魚知樂憑軒鳥暗窺蕭疎故園思徐步欲何之

雨後登白雲樓

乘暇獨登樓捲簾清遠眸無堪望中意翻益醉餘愁雲
合山常暝烟輕雨乍收行藏吾自識曲枕信悠悠

聞大同周將軍物故

絕塞猶驍騎中原失虎臣空餘裨革志無復據鞍身動
地千門哭悲風萬馬塵將星知未隕天子重推輪

其二

沙海長城斷單于秋意深轉愁新將令難識舊軍心赤

羽時傳警黃金不可尋
馮唐撫髀對今古淚沾襟

曉行西山從間道發即景有作

中逵暫改轍高眺對蒼然
曉徑松花合秋林楓葉鮮
穿蹄出穴兔薄皆護巢
鳶隱隱聞笳鼓無何薊北天

送劉戶部之南都權引鹽

再徙司農秩仍分使者衣
秋深榭葉冷江濶錦帆飛
日夜軍聲急東南地力微
漢家鹽筴議待爾叩宸扉

贈汪生游遼左

壯志羞彈鋏生涯問曳裾帝城不可住邊塞復何如古
戍霜侵早交河月滿初秋笳吹又急容易鬢毛疎

游天寧寺

褰裳春出郭扶病強招尋自是塵中侶同皈靜者心城
陰催落日野色斷高岑何事諸天界能令離思深

送人之漳州驛丞

一官初拜魏匹馬遠投漳海色家家雨寒梅樹樹霜雲
中下飛傳天際出餘皇賦就多蠻語能無憶故鄉

寒食前三日出郊外遇雪有作

氣候今年晚燕山雪片飛可憐近寒食猶未授春衣半
吐花如落能歌鶯尚稀長懷浴沂伴日暮咏而歸

高郵遇同年龔生舟次醉成

握手語未畢呼童且列筵停杯坐秋色看棹下江烟汝
狎嚴城漏吾耽據榻眠不知何所道小別是經年

送王亮燾下第

北風吹馬鬣寒色滿貂裘以我未能去逢君不可留亂

砧淮浦夜孤戍薊門秋為有幽芳在何須嘆薄游

均美兄之分宜丞取道歸里

河壩置別筵把袂未能捐落日邊烽出孤星海樹懸干戈淹歲月舟楫任風烟直有連枝淚疇吟春樹篇

其二

今日悟歸計秋風空羨人爾同彭澤宰况展柴桑輪鳥雀稻禾熟雲霞橘柚新倘憐纓組弟非為罷官貧

夏夕謝山人馮戶曹朱駕部伯隣峻伯于鱗三比

部見過分韻得天字時謝將有行期

門巷高軒過琴尊別思懸明珠動深夜白雪破炎天濁
酒能中聖狂歌競謫仙還欣竹林賞西傍禁城偏

過姚園作

姚園聊屬我吳客自為羣白水秋先得青山雨不分藻
翻魚意樂竹靜鳥聲聞談笑淹歸馬衝泥戀夕曛

張中貴談武廟時事有感

老病張中貴曾陪內教場五營徵介士六部選名倡白

馬平陽月凋戈青海霜怕歸長信謁語語是先皇

初秋夜坐有感示于鱗

不寐宵聲發孤吟秋色來關城羽林騎鐘鼓栢梁臺世
事文章遠鄉心戰伐催長安李生在猶可對銜杯

陵祀

松楸何不極複道見行宮劍珮千官月橋陵萬馬風地
迴山盡拱雲合樹俱雄白首先朝事傷心涕淚中

其二

迴合宮牆出分趨禮數同夜歸千嶂裏春度百花中列
宿俱垂野洪濤併在空出游神意肅石馬自鳴風

荅友

穎考元工俗來譏阮氏狂詩何預成敗酒頗礙行藏雄
白元難守雌黃未易當先生但吟醉荅爾意茫茫

其二

稍為耽詩酒都忘世路難詩憑千古在酒放一身寬濕
束豪雄小途深禮數安那能事斯語便欲棄微官

春日同于鱗茂秦集韋寺水亭分韻得重字

偶成春服始挾侶問幽蹤芳草近寒食空林聞午鐘驚
波雙鳥出迷路一僧逢欲竟名園者停杯感慨重

簡茂秦

飄梗真難繫垂楊未可攀君名去留外吾道是非間且
白人前眼憑蒼客後顏蕭然一長揖詩句滿春山

過秋曹後懷棘寺舊歡寄謝諸丈人

棘寺饒期集憐予齒最早暮雲催握醕秋雨聽彈碁攀

附多先達風流並我師不堪今咫尺相望即天涯

其二

興愛提壺語歸從歎段催落花風後逕芳樹雨中杯祿
薄存交誼官閒見吏才未愁西省隔折簡即能來

其三

憶爾郛筒酒來從蜀客船開尊須盡日促席解忘年懶
即隗俄坐酣仍鼓趺眠只今雲省夜茶椀對殘編

聞盧生將出獄志喜

聞道游梁獄斯人實可悲紅顏翻自累白壁轉堪疑
失意乾坤小孤蹤雨露遲向來吹黍律開落竟由誰

其二

骨立盧生在羣銷好自支膏焚獨明日灰暖再然時
鸚鵡元驚衆鷓鴣未穩枝江湖去仍廣勺水借恩私

生業已蕩

盡故云

其三

此際獄中劍曾逢雷令非提攜終奮迅拂拭有光輝一

旦雄心托千年國士稀憑將報恩用不作化龍飛

謂陸令也

送僧之楚

西來為傳法南下豈離羣夜梵神魚響秋空法鴈聞浮
杯洞庭月飛錫衡山雲若向黃梅去心香一寄焚

憩弘慈寺空上人房

下馬叩空門逢僧禮白雲為心一蕭散別路自塵氛犬
避曇花席鼯飡貝葉文大都論佛性難作有無分

許解元悼妾

帶有同心在絲將續命遲淚偷埋玉地心折賜珠時解
幌風從入鈎簾月自垂安仁故亡恙不那髮成絲

其二

天上仙期迫人間別恨深吹簫不同去步幄杳難尋入
夢驚纖玉聞香剩鬱金都將可憐意留作斷腸吟

其三

十五繡鴛鴦粧成贈阮郎蛾眉西嶺月鸞鏡九秋霜小
雨流蘇暗闌風錦簾涼欲從天外覓誰遣返魂香

其四

雲鬟白玉酥人道勝羅敷所念前魚泣寧知別鶴孤同
心悞綵綫如意妬珊瑚往日西陵栢蕭蕭長夜徂

夏日小理花榭漫興

謝客冠長解拋書酒漸親陋甘為圃問拙憶灌園人引
瀑全宜暑栽花已過春忽驚搖落思高柳暮蟬新

其二

小樹僅能接繁花手自修閉門疑在野積雨乍成秋萬

事何青眼諸公豈黑頭還嗔妻子問祇為俸錢留

其三

落落孤松樹空齋意敞然誰來醉明月獨坐看青天解
髮步兵嘯披襟中散絃那能畏官長騎馬問流年

其四

握管真憑我銜杯不讓人風塵世已甚慷慨復何陳歲
月持螯手朝廷食肉身無為互嘲諑各自有沉淪

送唐園任福寧吏目

祿薄君休問，閩天可計程。
呼兒看蜃市，對客註魚經。
巖雨任公白，山雲姥青。
蕭然坐州幕，鳥雀下空庭。

偶題

轉目風塵色，人間睥睨過。
官貧為具少，兒病檢方多。
時論俱戎馬，鄉心幾薜蘿。
毋勞問推轂，吾意亦從它。

其二

案牘吾何厭，形骸久就拘。
聊因對樽酒，相與得須臾。
宦路皆先達，詩名豈病夫。
乞歸猶未敢，清夢或江湖。

喜師錫比部夜來自南留酌有贈

三載傳書札相逢恐未真
應門懼舊僕屈指問交親
雖忝貪能具鶯花晚更新
相看素衣在天地久風塵

遣興

日月真萍梗乾坤任酒卮
獨行身外計苦思髯間知
得路車驚轍爭棲鳥剝枝
小兒能學語不遣誦吾詩

其二

浩浩乾坤裏支離未可憑
孤踪病妻厭高卧鄙夫能歸

計鄉音薄微官世態增討論多戰伐或恐在堅冰

長安初月

長安半輪月霜色滿金河俠客聞刁斗天山一劍過橫
穿卸支塞歸騎曉星多忽憶盧家女流黃欲罷梭

其二

青樓狹邪婦秦月照眉鴉蕩子嫖姚幕寒霜作髻花功
成萬戶賞莫向枕邊誇西去金張里生來將相家

汪比部遷慶陽守問之

吾愛汪夫子虬髯凌紫烟詩仍我輩讀官得衆人憐北
地逢賢守匈奴可近邊幾時驅馬發雪裏渡秦川

羣盜

赤子吾馬忍兵戈見綠林橫行鋒可近不殺意仍深江
海思骸骨朝廷問腹心誰云大臣在家國共沾襟

其二

天遣文安盜狼山一夕風深恩是先帝急難有羣公身
世吾何晚乾坤事未窮豈堪遼左戍吹角月明中

題東臯隱居四首

世路已知晚山花長見春
曾為獨醒者歸學耦耕人
小婦能蠶事諸孫理釣綸
青天五柳下藜杖一間身

其二

孤城秋欲老兒女亦欣然
罷社金香酒迎寒雪色綿
登場鳥雀下出市魚鰕鮮
興發苔溪畔長吟梁甫篇

其三

偶來天目卧修竹自成居
飛瀑面衡宇青山手道書
花

問謝車騎鏡裏出樵漁不學於陵叟桔槔恒晏如

其四

犢外收春雨松間候夕春比隣過流水燕坐數諸峰白
恰野人狎籃輿刺史逢愀然雲色變或恐出從龍

天寧寺同諸子餞別公實

上方期不住初地已成賒握手蒼梧濶題詩白日斜坐
深聞聖樂別至散天花歸向曹溪路新詩悟後誇

其二

白足逢高侶黃金說勝緣
雨時龍象出星外佛燈懸
斯物能千古吾人各一天
還應斗間氣相望並森然

夜飲柴生

吾晚耽劉毅臬盧一擲迴
天風吹幘墮海月趲杯來
醉習時人態狂容傲吏才
思從市中俠走馬度章臺

濮陽李明府自新喻再寄
予詩茲以覲事駐城外屬
時禁方嚴不得出視悵然
有懷

曉露沾鳬舄寒星識鴈臣
君行濮上路予憶郢中人
河

嶽成跬武天涯豈比隣解嚴須努力春事日方新

纔江

秋江有殊色木落芙蓉鮮颯爾一鴻去天空波淼然偶
來維櫟步忽憶伐檀篇欲采誰堪寄徘徊空自憐

送張虞部伯啟左遷常州別駕

與說當年事孤臣奮欲飛乾坤淹帶甲風雨促征衣事
定殊文武權歸互是非所論寧遠謫惜爾寸心違

其二

國難徵兵日君恩佐郡年郡橫秦望雨兵入薊門烟衆
謂波相及吾知道固然還期保障意茲地股肱偏

其三

冠蓋無容地蕭然一郡丞孤帆下揚子秋色滿毗陵白
日垂難問青雲傲可憑汝能勤撫字夫豈愧飛騰

其四

把袂翻輕別沾膺自感時主恩遷地近吾道小臣宜月
迫延陵劍潮平太伯祠古人崇退讓今子莫淒其

正月十四日夜同茂秦于鱗子與子相集靈濟宮
公實館分韻得燈微二字

欲暝天全白將規月漸升龍銜員嶠燭星燦紫微燈綺
色深三殿鐘聲散五陵醉須攜興住春事日相仍

其二

夜色瑤宮映華燈玉樹依參差見花發歷亂覺星微禁
藥通沉火仙音度羽衣還看醉來夕緹騎禁全稀

早春同于鱗公實訪謝茂秦華嚴庵

吾與二三子行游覽物華暖仍幽徑雪寒未給園花客
熟能為黍僧貧只施茶更愁歸興促騎馬問人家

其二

白社遲安石青林叩遠公乾坤吾輩在身世幾時同草
樹寒輝後松杉暝色中重來應爛漫一笑虎溪風

客有秦生者嘗尚魯翁主後流落死京師其友李
子為治後歸之

昔侍靈光日紅顏白玉珂恩深百歲少貧至一身多故

舊生涯在悲歡隔世過還逢脫驂者沾淚向江河

問訊梁公實

問訊梁公實聲名未寂寥病何關藥餌貧豈任漁樵十載能吾輩同心正久要邊書況昨日散捷紫宸朝

其二

汝病風塵外吾衰景物中詞人歌太乙酒客卧新豐彈鋏心猶嗜驅車路轉窮飄然五噫詠天地一梁鴻

悼亡兒果祥詩十首

得汝三年內那能一日忘誰知浪驚喜翻為助悲傷處
處難開眼時時總斷腸病夫骨髓盡未數淚千行

其二

一病無旬日奄然喪此身何心吾在世無計爾為人昨
撫猶如玉今看已作塵平生娛弄物觸着暗傷神

其三

眉目真如畫聰明解讀詩見人為禮法依母倍恩私事
事俱堪繫聲聲未忍離不眠仍起喚星斗夜空垂

其四

月月山東使平安兩字存昨來見書到半是憶兒言汝
爺心已折汝祖念彌敦說到傷情處青天日自昏

其五

動止能如意歡啼並可親縱無千里足堪慰百年身得
食先分姊更衣必示人難揮汝爺慟聞者亦酸辛

其六

不禁西河眼悲深漸欲枯逢人失應對散帙強支吾顛

倒還疑夢依稀或類呼誰將二女慰轉見一身孤

其七

見汝娟娟靜誰能不解顏身唯識燕市骨僅返吳山痛
入啼呼外逢應夢寐間如憐泣成血他日見探環

其八

芝蘭春已折庭館晝空沉判老江湖骨難窺天地心入
門傷几案跨馬畏朋簪欲問容身地茫茫不可尋

其九

可愛俱無跡唯餘一痛傷招魂歸杳曠追路失蒼茫萬
事甘人下餘生怕日長淚痕羅幌底斜月映如霜

其十

慰藉諸親舊殷勤強破愁斯文一身在遠道二親憂感
極神俱竦聲吞淚復流忘情豈我輩分已愧莊周

公實能數學未許予上壽也書此自解

聊尋文覆者何日盡予年萬事俱人後那能此獨先汝
云無蔡澤吾道豈彭錢不見青門土千秋誰更賢

子相在告以詩問之時予抱沉憂之疾久矣

吾久違朝謁君何抱病同詩成無萬事更任有羣公今
古榮華外行藏感慨中想應填巷轍門掩白雲空

其二

爾病猶能賦揮毫捷有神浮雲愧知己細雨向吟身伏
枕謀逾拙纓冠性豈馴倘憐長醉意不減獨醒人

入臨皇太子

薊北逢春盡千門積雪多忽聞俱痛哭竟已接謳歌月

隱中峰嶽星摧幼海波可如王子晉騎鶴一來過

送戴同年令閩

憐君似安道而我愧王猷清夜數相過玄言時自酬
宦游輕別路作吏更南州山閣荔枝熟毋忘西北郵

送錢大

錢起名儒術兼為醫者師論心或不愧緣病得相知
乘遽君何往飛觴醉不辭莫言離別易看取鬢邊絲

初贈謝山人山人時館京山都尉

斗酒誰相勞高齋此獨醒暫依中禁鬻不作五侯鯖下
里傳春雪高天動客星平生厭冠蓋對爾眼能青

春日同李三比部有懷伯承明府

佳日試春酒停觴南望頻偶因文似者偏及意中人入
夜青萍合連雲碧樹新空為可憐語天際竟誰陳

送彭進士謫江右

何處滕王閣遙維八月舡雨飛南浦綠雲入大江青憶
遠憑春樹占程問客星待君重有賦慎莫恨飄零

送張子訓導臨江

有客南州彥，棲遲劇可憐。
一官新白髮，十載舊青氈。
朔霧濃行色，春風入暮年。
劍光何處發，玉筍倚南天。

贈張內翰還楚

洞庭八百里，春波正渺茫。
誰將木蘭檝，君是紫微郎。
桂識留題字，衣分舊賜香。
毋為戀芳草，久已待長楊。

送周子仁淮安理刑

春波沙岸青，之子獨揚舲。
淮楚開雄鎮，東南候法星。
月

明鄉樹出天濶暮雲停予亦棲棲者驪歌未忍聽

送欽水部

歲晚輕為別輶車冰雪遮君才何水部予咏折梅花茲
地銜臚集為郎轉餉賒如逢訊南北憔悴總堪嗟

其二

青蓋白雲艘尚書水部郎吏迎花底繡牕發鏡中檣不
廢穿林屐時懸愛客牀還思薊門餉飛輓正相望

送徐生南還因訊陳員外

挾策辭燕市南州有令名白雲帆際色黃鳥席邊聲裴
馬游將倦兵戈氣未平共誇能似舅為爾憶冰清

弇州四部稿卷二十三

欽定四庫全書

弇州四部稿卷二十四

明 王世貞 撰

詩部

五言律一百二十二首

贈寄史生

生與黃子俱為齊梁體

近來稱藝苑江夏爾為雙
湖海猶勁齊梁意未降
汝聯明月壁予汎白雲艘
何日探奇字花間倒玉缸

四月一日同于鱗子與諸君水頭放舟六首

何處園池好唯應西郭偏
惜當春後日狂愛水中天
瑤瑁人馬葡萄上客筵
那能不深醉北望有風烟

其二

朝來寬請急醉宿亦無妨
舟楫青天近林塘白日長
浪花魚自起風葉鳥難藏
忽有吳歌發滄洲意欲狂

其三

繁塢疑春在空塘得暑遲
長年木蘭棹游女竹枝詞
萬

樹聲俱發千山坐覺移飛觴予不厭促騎爾何之

其四

走馬長安陌放舟河水濱風光餘澹蕩天地此逡巡住
暫依芳草行看破綠蘋無妨疊鼓吹不起漢關塵

其五

歌管能回日輕舠自任風人家漁網外山色酒杯中心
事歡仍見年光醉未窮褰裳吾欲涉菰際忽驚鴻

其六

醉客雙眼白繁花一樹明乾坤憑去鳥日月問騎鯨懸
沫星濺躍輕颼浪熨平此中龍穩卧或恐夜珠驚

後九日重與應李諸君水頭放舟

為有滄洲趣重來肯厭頻溪鷗渾狎棹籬犬不驚人
物色時能改心期日更真僕夫毋太促吾醉欲經旬

其二

韋曲看如故高陽侶半非清朝耕釣遠公事宴游稀
賓主忘分席陰晴數換衣夷猶竟日暮聊與詠而歸

其三

此醉吾何惜沿流亦快哉山光入返棹水氣促行杯岸
幘天雲合酣歌海日迴風塵能傲吏朋舊任微才

其四

旬日乘休沐芳洲綠漸迷菰蒲疑水落禾黍覺天低汎
與心偏在浮生衆豈齊看他冠蓋客斜日五陵西

夜集有懷謝茂秦分韻

故人元不乏猶問白頭翁此夜漳園賦誰當謝朓工小

儒矜倚馬薄俗謂雕蟲爾自黃初際翩翩作者風

其二

被髮長安市乾坤一嘯歌歔歛吾輩晚跌宕世人多短
褐春仍在新詩老任過祇應西望處殘月滿漳河

寄萬郎中恤刑楚中

似爾飛章少看他屬傳同星辰南紀濶雨露帝鄉公躡
履衡雲外裁詩峽色中蒼梧去無盡恐晚北來鴻

其二

聞道衡陽使真能鑒覆盆淒涼汨羅水嗚咽楚臣魂一
代心仍屈千秋賦自尊如堪薦蘭芷芳意信乾坤

端午

亦自酬佳節何當病故侵綵絲從女競蒲酒賴妻斟時
序他鄉物風塵倦客心放舟吾舊侶應向越江尋

其二

抱病無端午驚從稚子傳折蒲聊舊俗續縷更流年佳
客頻攻懶狂夫只愛眠山公使歸說箕踞抑陰前

子相考功

來約
不赴

病中于鱗子與公實子相夜過

此日羣公過能令稚子歡珠光海月動劍色夜星寒
牢落千年在浮沉萬事安時人歸眼底世道總眉端

其二

平生語不盡茲夕罄相逢意氣扶衰眼歡呼失病容
公才競班馬吾道豈夔龍忽憶吳山月雲深萬壑鐘

病中承三子各以五言二律相問率爾有答酬于

鱗

吾子篇章貴經旬思一搜長懷愧薄劣不敢問遲留白
日斗文動青天壁色流野夫何劇喜萬象總深愁

其二

落魄吾仍在沉冥爾若何即容雙眼白轉見二人多燕
市軻離輩沉酣亦笑歌愁還付天地名不廢江河

酬子與

一榻專吾過春風細討論子桑容被髮泄柳故應門抱

病雄心改違時大雅存詩來重噓借未敢對人言

其二

斗酒相勞苦清吟未寂寥豈應耽落魄或自厭扶搖禮
樂窮逾遠迂踈病轉驕子其稱籍籍吾欲付陶陶

酬子相

嫩人忽相贈佳句比南金客訝山濤札予知湖海心已
能蘇病骨不必問知音把向中庭誦明河秋色深

其二

但使頻辭病吾生樂自偏已無官長束兼得故人憐雨
色殘虹外鄉心過鴈前縱有耽詩癖年來實怕傳

吳人杜惠由小侯棄官歸卧好談玄理余時避地
過從甚得賦此贈之

何必避名姓雅無廛市風少年結劍客中歲禮壺公白
石貧家事青山靜者功買田從此約俱卧五湖東

其二

豈謂竄身地過從意不孤以君初厭武要我亦逃儒細

雨蒲團坐荒畦竹杖扶自言唯一事頻累酒家胡

白河道中

極浦明鵝鵲天空雙櫓哀河流樹杪出山色雨中來驚
鯉超魚網歸鴻度酒杯推蓬坐箕踞鄉思亦悠哉

其二

予亦金雞使聊乘青雀船平生托湖海此際失風烟野
色紆長嘯漁歌起扣舷故人誰贈我司馬壯游篇

病承公實詩問率爾有酬

相逢盡年少那可問投閒偶爾彈流水知君念故山青
雲謝騰蹕明月寫潺湲昨夜羅浮色宛然眉宇間

重過張太學因贈二首

憶昨丁年客聽歌子夜長葡萄濃不瀉瓊樹儼分行別
思花如霰歸途月似霜重來但立壁蝸跡在胡牀

其二

萬里皇華節殷勤委巷尋向來逢一飯茲意失千金易
憶窮途事誰餘往日心茫茫燕市筑曲罷幾知音

見德州李帥談邊事有感

秋色大荒甚單于吹角時移營千障急轉餉九邊遲國
事俱黃口材官幾白眉向來歌舞地回首半瘡痍

與周叔夜論詩

近來稱作者屈指問知音骨格誰真近聲名爾自尋中
天秀嶽色大海鬱龍吟一出無今古時才總陸沉

中秋夕沛河汎舟

玉鏡中天挂金波大地流河明千樹色秋滿萬家樓迥

奪魚龍卧平添烏鵲愁故園盧女瑟應復問刀頭

其二

萬里人初半三秋月正中天清涼似水江濶靜還風玉
借蓬萊館珠懸碣石宮時聞沛兒唱猶數漢皇功

新河道中

誰遣風塵裏滄浪意不違波光一雨合秋色衆山歸乍
可漁竿老那能馬足肥長歌向林薄紅葉盡翻飛

將渡江泊儀真即事有感

海色將秋遠潮聲挾雨振地嚴催鼓角帆迥入星辰薄
祿偏為客他鄉易畏人寧知一水外日夜有垂綸

丹陽

垂晚丹陽道高秋白下船人因鄉語狎吾豈宦情偏野
釀浮橙綠香梗入鱸鮮向來看雨色衰草薊門天

將抵家有懷雲鵠給事

與君終日醉猶恨故山違天欲塞鴻盡秋先颯葉歸青
油使者舫白苧女郎衣總是江南樂乾坤舊侶非

其二

地入長洲苑天迴錦繡鄉歸來雖慰藉朋舊實淒涼萬
事存知己孤臣易斷腸祇應青瑣客南望或停觴

贈張節計偕北上遂訪歷下生

自別李生久乾坤吾不容汝才今倚馬於辨復雕龍一
見時名失千年國士逢當令薊門樹不復響秋蛩

聞京師詔下志喜

斧鉞嚴清禁風霜動紫霄向推聊試絳終殛豈慚堯逆

黨謀全折驕兵氣欲消普天欣止戰吾計可漁樵

其二

此日攬槍掃何云落將星中原無戰伐高廟有神靈一代家仍赤千秋史更青當知竇車騎勒碣尚垂銘

其三

將相須才致時來亦偶然國威推轂重君寵解衣偏白刃寧求敵黃金自有權汝曹判一死天地正風烟

其四

聞道將軍第，荆榛車馬稀。
交游愁姓字，部曲掩光輝。
日月明何損，君親計總非。
隴西羞李氏，敢道漢恩微。

題畫

卜築人間遠，滄浪秀可餐。
長天一鳥去，明月數鴻殘。
何處迎風奏，流音度遠湍。
匡牀醉欲醒，秋色不勝寒。

阻風湖口

雨色千艘轉，濤聲萬馬驅。
河山歸慘淡，天地失須臾。
獨坐思舟楫，微官任道途。
何堪一羣鴈，失侶自哀呼。

其二

津吏迎相挽孤帆盡日稽束雲淮縣小崩浪楚山低風
雨千靈集乾坤七聖迷長安不可望畏路重含悽

仲冬六日江比部來言昨君生日也予始記書此
自解

忽忽吾何有紛紛強自支生辰公牘過佳節故鄉知竊
祿難輕引為郎敢望移西京珥貂客白髮總揜垂

雪後晨起小酌有作

一夜大荒白孤城吾眼明
僊人吹玉笛飛步下瑤京
細酌千愁改冥搜萬象驚
古來得意事豈必勲與名

過比部朱丈射陂草堂二首

客有孔融刺君還徐穉
床著書深草色懸壁競湖光
意氣寒溫簡郎官歲月長
踟躕醉將別吾意未能忘

其二

入君宴息處香氣似禪居
趺坐心相語真文手自書
青天袒褐素落日巾柴車
不道身猶貴山人恐未如

長至前一夕丹徒道中

積朔疑無際微陽始漸臨
漏偏今夜永寒自客途深
劍珮仙曹夢衣裳稚子心
那堪更飄泊擁被獨愁吟

渡江即事有感

吳楚一江合風烟萬里開
秋天鸚鵡筆日莫鳳凰臺
流落猶驚世英雄始忌才
如何對玉軫絃絕重徘徊

除夕

久客家能好殘年日怕歸
鬢毛餘感慨童稚轉光輝
目

與閩雲盡心隨薊鴈飛酒醒予夢破遮莫問朝衣

家君在閩

北使至有感

在野將成習降心欲近禪人來薊門雨吾醉闔閭天未
敢輕時事終知短世緣看他江畔柳早晚弄雲烟

同諸君汎虞山下二首

不盡青山色維舟雨後看閒雲流几上飛瀑散林端游
女千花暝狂歌萬竹寒未須疑酒盞吾豈任衣冠

其二

鼓枕江南徧茲游頗更雄天疑破柱剝山似逐推蓬吹
笛泉聲外披襟雨色中前溪正宛轉不必念途窮

王令招游虞山

鳴騶向城市緩帶復郊垞海色遙吞白天光自與青汝
無慚地主吾敢應山靈便欲依巖卧停杯問摘星

南軒遠眺示王令

憑軒此高眺眼底意蒼然一氣千江合孤踪萬象先席
移將墮石琴起欲飛泉不分王明府能令勝地專

過子游虞仲祠

一代言文學千秋虞逸民列星垂氣象滄海絀經綸太
上有立德其先不辱身遐哉不可見吾請事斯人

散步

飯罷欲何適獨行扶興長出門青草逕隨地綠蘿莊麥
浪搖晴旭松雲逗晚涼炯然鷗數點吾意漸相忘

屈指

屈指同心客經年省署稀豈皆吾道拙或與世情違一

醉乾坤是孤吟歲月非祇應罷簪紱甘老薜蘿衣

亂後初入吳舍弟小酌

與爾同茲難重逢恐未真一身初屬我萬事欲輸人天
意寧羣盜時艱更老親不堪追往昔醉語亦傷神

叅省吳君挂冠之後以時難膺檄募兵耀武虎丘
元戎夾鉞隊晴日試吳閭吹繞千花發旌從萬樹張霜
文散組練海色滿餘皇談笑飛書去滄波定不揚

其二

自爾龍韜偃誰當羽扇麾據鞍還草檄橫槊更談詩祿
食羣公擅戎衣野客疑功成不問賞應向魯連知

與抑之游虎丘寺

風至開山閣雲歸卧佛床薄巖施屐易踈竹進牀涼醉
益狂奴態游偏傲吏長興酣公莫舞秋色起干將

崑山別張通叅丈人

風塵吹逆旅天地老垂綸共醉青山色偏傷遠道神離
前多怯酒亂後各憐身欲作披襟話秋霜鬢易新

寄宗子相

先後成歸客艱難有避兵地偏窮遣信天坼異浮生桂
樹雲常合桃花水未平何當徇微祿愧爾向時名

其二

明月和溝水飛花繞郭多閉門時輩遠開卷古人過舊
社誰能繼新詩各自歌更論燕市飲相顧邈山河

高郵別表兄盛生

留君更前路樽酒暫流連故里人將盡他鄉語欲偏帆

來湖上雨鳥散渡頭烟家國今何限深愁眼劇穿

訪李文修撰子相考功承二君見候不值有感

誰道嵇康懶攜琴載酒杯仙舟空不見日暮獨徘徊桂
訝淮南近帆疑剡曲來知當動星象不必擬三台

再示子相

會夢時能作今來恐未真獨行却水上天濶四無隣別
後長如此幽懷可具陳腰間有雄劍拂拭氣還新

子相草堂夜話

世途誠浩蕩吾黨亦浮沉見汝棲淮海雄心自古今偶
成全豹隱忽漫一龍吟不有安期駕雲深可易尋

其二

剪燭頻相藉隣雞月又新隔年唯一笑回首竟何人湖
海神偏王雲霄夢未真所嗟從此別辛苦易沉淪

其三

聞道青蓮客新乘五馬車亦知多忤世無那轉憐渠長
揖難官長高吟恐簿書因逢同病者北望更躊躇

談于
麟事

十六夜泊彭城與張給事廷槐月下小飲

此夜彭城月清光萬里寒河流天地合山色古今看桂
樹香徐吐金樽漏易殘與君聊一醉途路失艱難

十七夜飲月下因懷昨年亦淹此地

昨歲逢茲夕徐方月下船客途今又到秋色去仍偏岸
幘風霜裏開尊鴻鴈前不堪頻遠望南北總潛然

聞彰德寇起志感

此際潢池警橫行自豫方孤城壓暈黑千騎宿霾黃衷

甲謀非拙橫行勢可當如聞天下險或恐向教倉

賊易衣而

入郡甲者出
堂隍間執守

其二

南北殊憂難中原近若何向來論守相或恐致兵戈枳
棘春偏晚風霜暮自多始聞徵渤海垂白竟蹉跎

其三

汝輩勞宵旰徵兵幾道聞虎符新使者猿臂故將軍鼓
疊滂堤浪旌連毫社雲只今惟一戰白羽莫紛紛

登太白樓

昔聞李供奉長嘯獨登樓此地一垂顧高名百代留
白雲海色曙明月天門秋欲竟重來者潺湲濟水流

初夏燕京南陌

落日散平楚餘春留遠阡問津禮樵叟下馬拾榆錢
白挾千峰雨青迷萬竈烟笛聲叢薄內宛似太湖田

送王生下第秋歸

娉娉薊門柳來往惜年華楚客停舟夜胡姬賣酒家
柰

歌南去近書鴈北行斜此際毋揮淚秋風江上花

庚戌秋有約吳峻伯不就賦此

漢樹淹邊月天都拂塞塵九關虛虎豹層閣望麒麟社稷羣公手兵戈一介身請纓還請劍慷慨涕沾巾

夏日游弘慈寺僧祈雨乞午齋而出

此日依蓮社真成戒酒杯胡僧多寶座士女獻花臺說法老龍去隨緣甘雨來衝泥予不厭騎馬夜能回

天寧寺晨起即事

小榻棲蘭若朝來得縱眠
依依上牕日隱隱隔墟烟
偶轉曇花逕間翻貝葉編
隨緣可度日無意更求禪

沙河橋

何年鞭禹石突兀亘沙洲
山接垂虹勢波穿偃月流
寢園高自見車馬迥生愁
不敢題紅葉知他達御溝

初葺省中西亭

仲長慕清曠潘岳賦閒居
吾亦聞斯語疇能返故廬
得閒聊假息隨意試抽書
公署長如此金門大隱餘

其二

固愛春陰好，兼愁秋雨聲。
以茲無所植，獨坐有餘清。
岫幘浮雲度，攤書落照明。
避人吾已足，何事更經營。

贈湯少府子重

彭澤古達者，簿書安可羈。
逢人羞作吏，竟日坐談詩。
春暖花源寂，雲深藥逕遲。
聖朝如可戀，未有去來辭。

得家君楚中信

不見衡陽鴈，新年入夏初。
忽逢江上信，疑是夢中書。
楚

旬春夜薄燕山夜枕虛白雲猶在眼凝望意何如

齋日東汝欽博士

晝餘公事簡獨坐候斜陽偶却琴書擾時聞花草香清
齋予不厭別思爾俱長後夜知誰醉惟言恨太常

題朱象玄小獼猴

南中榮木食憐爾滯長安幸托王孫號羞帶楚人冠意
輕全欲竄羸弱未禁寒寧無離羣歎得食暫成歡

西山道中有感

驅馬度潺湲聲從亂葉間
高秋出遠戍落日滿諸山
寢殿金為室長城玉作關
垂衣先帝業回首愧朝班

濮陽李明府自新喻再寄予詩茲以覲事駐城外
屬時禁方嚴不得出視悵然有懷

萬里君南去新詩得共誇
如何近帝里轉似隔天涯
霜白楓難改雲黃日易斜
還期載春酒同醉洛陽花

贈明竺上人

竺師震旦秀天骨何昂藏
一雨萬流合斜陽千嶺蒼
坐

來揚枝水忽發梅檀香擬問西方路人天並杳茫

貽寺僧

且莫呼檀越還攜貧里簞無法可施汝將心何處安石
牀涼睡足僧飯午鐘殘聞有函經在能留次第看

推案作苦息而試筆簡子與

推案輕過日趨曹易逼年故交咸鹵莽時態乍留連滿
地疑詞筆千秋豈吏權忍判從此際著意媚風烟

哭宋郎中文明

關左班初罷楹間夢已長古今殊頃刻笑語落冥茫露
被先生婦揮金同舍郎征途冰雪裏誰不為沾裳

其二

憶昨清源里高秋駟馬停猶然稱節使忽爾返芻靈素
旄寒仍發朱扉雨自局新阡數行柳誰復記青萍

同子與正叔夜過順甫

腸意深難盡春光緩未迴日餘歸案牘天濶僅樓臺寂
寞耽吾黨榮華逐世才莫為殘漏惜過爾易徘徊

綠尊草堂為沈君賦

君是休文裔忘憂祇綠尊
飛花翻作徑野竹自為藩
客有攜琴過童知荷鉢言
壯心燕市酒相對共銷魂

除夕

憶昨江城暮椒花耐晏眠
異鄉春較緩佳節意翻憐
餘食趨童稚深杯撥歲年
坐來殘漏緊騎馬問朝天

其二

節物燕京盛茲看太惋然
荒荒羈膈色袞袞競新烟
憶

語須同日傳觴有各天
干戈竟何限骨肉漸隨緣

至京喜仲芳尚在

不謂夏臺畔能留復至今
朝廷寧仗汝天地獨無心
北極瞻逾切中原畏轉深
茫茫薊門樹暝色滿秋陰

春日意不懌折簡徐魏二子過飲

客歲添殊易生涯問轉難
塞雲經晚變燕日到春寒
世眼翻相白吾顏豈重丹
且呼班尹醉北斗任闌干

懷容城生

已決千秋事還餘萬死身
避人應有惜談爾竟難真
鳥雀同迷歲荆榛可望春
不知縲紲畔誰與授書頻

送姜君之衡山令

爾去神明宰青山治不難
祝融天一線石柱雨千盤
鴈自南荒盡鳬還北極看
中臺今太史應識漢郎官

正月八日城西訪徐尚寶出使還

遇爾城西陌初停四牡馳
乍晴為穀日今雨正瓜時
暝色過談易春泥策蹇遲
畏聞鄉井事羣盜亂如絲

訪汝厚善果寺

客居蘭若遠為爾特相尋
宦跡容顏在離懷髮髮深
暮生高殿角春入古槐陰
更有彌天話能淹不住心

春日郊游有懷于鱗

春甸堪吟醉何妨藉草留
醉扶天地語吟壓古今愁
鉅鹿山層去盧龍日亂流
將心向誰剖真覺此生浮

贈魏順甫

此道榛蕪日誰當草昧才
用專愁鵲視心遠釣鰲迴
狂

簡緣吾得聲名舍衆裁須令屈宋後嶽色重崔嵬

與子與諸君即席分賦得瓜

綢圃垂玄斲雕盤薦綠沉疑萍耀朝日過麝失春陰黃
臺太子咏青門故侯吟假彼寒暑候消予榮辱心

再賦得魚

湖海羣分寄悠然意與深相教惟出入於道有浮沉未
展垂天翼猶紆立極心寧知子非我聊復戀蹄涔

春日同子與順甫游姚園分韻四首

小苑停游騎春衣試緩風地容啼鳥今天借亂畦通草
色已驕綠桃花難禁紅科頭仗解醉非是學山公

其二

休沐知余簡幽期細討論共誇韋氏曲遙並辟疆園落
日驅詩語高天下酒尊暫來應有悟丘壑此身存

其三

爾輩成三益園亭勝頗兼春雲催淡蕩寒暝閣廉纖黃
鳥驚搔首幽枝出捲簾莫愁歸騎促殘日挂峯尖

其四

事事心相契難知可易忘片雲為碣石殘雨即滄浪草
重杯堪席花肥蜜欲房醉來須袒跣知爾恕吾狂

恨


時南北警方至謝生謁
李守不遂小有流言

零落先朋舊艱危但甲兵陸沉應有任瓦解向誰明展
轉疑吾道低回愧此生不知巫峽水流恨幾時平

贈楊翁

達者王孫後清時樂未涯諸賢典屬國千樹素封家鄰

竹肩輿過春雲席帽斜兵戈未須念源水秘桃花



弇州四部稿卷二十四

欽定四庫全書

集部

弇州四部稿卷二十五

詳校官侍讀學士

臣陸伯焜

中書

臣

劉源溥覆勘

總校官原任中允臣王燕緒

校對官檢討

臣盧應

膳錄監生臣趙立福

欽定四庫全書

弇州四部稿卷二十五

明 王世貞 撰

詩部

五言律一百二十五首

上巳同茂秦子與順甫游姚令園分韻

上巳游中得園亭興未涯蜂鬚低罨蓋雀乳細穿花水
曲青絲竿林間白鼻騮亦知催暮景寧忍擲春華

其二

小苑能栽竹同心有握蘭愛看春水漫貪惜酒杯難日
緩桃花暝天留薜荔寒未須論節序休沐便為懽

其三

故人同載酒策馬問柴桑鳩候千花樂蠶陰百草香共
驚醒後字還促醉餘觴君借春波浣縹塵已建章

清明

此日長安陌光輝自玉珂禁烟寒舊少愁鬼歲新多滿

地謀生拙殊方逼逝過未湏推物理天地竟如何

苦吟不就呼酒解之戲成一首

萬事從吾好新篇取次裁畏難聊罷筆遣興且銜杯宿
鳥放歌起明蟾深坐來得酣須就枕童稚莫相催

微雨獨醉

謝客門應慣呼尊手自斟但隨兒女戲未少丈夫心暮
景重雲就春寒細雨侵笑他窮阮籍持底學浮沉

醉過子與余魏二君在坐

諸君促席未吾醉只堪眠稚子私相命行杯競欲前虛
堂啟素月流水待朱絃嗒爾不能答炯然心所憐

雨中偶成

滴雨過深睡渾迷午候長宿鴉為暝色收霓更斜陽靜
得琴書理明添竹樹光物情聊共適吏事許相忘

其二

此際江南雨粼粼起綠波為農應更樂罷耒即長歌蟻
競煨尊汎魚誇受釣多長安流潦甚車馬暮經過

得仲蔚所寄亂後諸詩有感

避地乾坤小，愁身歲月遙。
榮華釀兵革，喪亂飽漁樵。
隱士紫芝曲，朝廷黃竹謠。
異時真愧汝，薄祿總難消。

雨中徙居承子與詩問即答

蛟龍不自制，驅雨徧神州。
宣辦兩儀色，爭奔千穴流。
吾謀慚埴蟻，世路薄巢鳩。
賴有黃門詠，能消獨客愁。

其二

煉石功難就，行雲事頗真。
橋如競牛女，室已讓鮫人。
急

難明情見流離客思新江湖滿天地未敢問垂綸

聞警

羽檄中原舊戈船下瀨新夢牽兵後信心死戰餘人緩
急俱時見安危况老親飛揚諸俠少或恐愛風塵

其二

寇盜方如蝟何時望息肩風烟昏大海戰伐黨高天有
信迷凶吉無家總後先不堪車馬地肉食共愁年

其三

怕詢開府使秋鬢雪添無母弟俱依越妻孥尚隔吳愁
憎雙眼在拙棄一身孤奮欲長纓請終軍竟棄繻

其四

聞道黃金募新屯海上兵敗亡誰後殿剽掠敢橫行戰
血黿鼉集愁魂烏雀驚欲歸無寸土何敢論浮生

其五

寇却餘皇上師逢攜李傷海波吹欲立雲日照俱蒼實
恐游麋鹿何言異虎狼

兵部臣猶謂
警與昔異

中原天漸小吾計

尚茫茫

詢吳舍人病

汝但棲金馬聲名未陸沉
官情秋事薄卧病白雲深
自反三湘弔彌堅百代心
高齋對玉軫寥落為知音

其二

懶朝初謝病青草閉門長
去俗為齋語矜人笑楚狂
寸心天未折孤憤世頻妨
濁酒如相命和歌燕市傍

夜坐偶成

湖海頻驚信乾坤可置身且謀今日酒能保異時人骨
肉名空在田廬跡已陳急難雙飽眼未敢視經綸

其二

塞垣搖白羽京輦闔黃金親計難歸拙君恩畏轉深一
生垂失路萬態總違心僅有文章在名山恐陸沉

病答明卿

伏枕一身事胡為相念深此生須覓汝終古在知音地
緩垂枯骨天扶未展心茫茫大鵬海變化或難尋

其二

得汝憐貧憊新詩慰藉多病添仍藥餌身在且兵戈拙
信乾坤戲狂堪日月多無勞駭容鬢吾已會高歌

于鱗贈梨酒

香擅中山酒甘分大谷梨已非茲土易況乃故人齋雪
壓漕漕滴霜雕顆顆齊便須供老母未敢及荆妻

簡茂秦

曠蕩長安陌飄然一老翁壯懷千古在衰態衆人同衣

食心難盡干戈計未工迴車竟何適勿哭世途窮

送馬揮使運餉還吳

仲孺名家子樓船轉餉師星霜過客傳天地老軍麾才
自銅符發恩憑玉劔知漢功誰第一不復數褰旗

寄子與

嚴城淹駐節飛雪捲淮波此地唯予先新詩任汝多論
交失宇宙把酒異山河倘念高陽侶春風掩戶過

其二

早晚辭桐栢春來到雪無萬山青待汝一鴈迥愁吾高
步才難發橫行思轉孤仗誰消日月為計亦江湖

簡余德甫

胡為數請急不受尚書期藥裹翻餘事藜牀掃為誰壯
心來折節懶性失耽詩我但攜琴造君無厭酒卮

哭梁公實

梁生不可作吾道迥堪悲吳市無雙隱函關失五噫淚
應枯德操骨好傍要離白日霾將黯珠沈合浦時

其二

但惜金蘭遠寧知玉樹摧賦留中使問魂逐大招來浩
蕩心難掩飄零業未灰何勞驗天意白首世人才

其三

翹首南荒外孤雲重黯然所悲緣異地誰謂不同天簪
紱辭賢路文章損盛年未須煩墨守吾及見玄傳

其四

草色羅浮滿茫茫不可尋乾坤間笛賦山水斷絃心大

業中途阻雄才半陸沉呼兒檢書札讀罷細沾襟

其五

客語騎鯨事誰傷賦鵬篇蒼梧墜白日大庾瘴高天吾
道有千古斯人無百年青門一杯土寂寞定誰賢

其六

脩文應不薄汝厭世途游白馬巨卿在青萍季子酬人
間總長夜嶺表忽先秋任識忘情語縱橫淚未收

其七

欲草名山志飄然滄海濱詩篇難覩老丹竈却添貧已
自乘元氣那能憶故人暫飛遼海鶴或恐是前身

其八

白壁埋輝照青雲委路岐斯文或後死未老竟安之敢
任昌言續無慚有道辭令名兼壽考今古總難期

其九

當年太阿劒拂拭有光輝出獄果何意延津還一飛星
辰元不沒河嶽自相依吾復憐雷令人今識者稀

其十

西郭招提外臨溪一笑輕諸天應有聽五子尚尋盟震
旦誰相啟恒沙汝獨行春雲空盡日駐馬不勝情

寄于鱗

遠樹太行壯亂流漳水深風雲來染翰河嶽映披襟鞭
弭中原約車書異代心並驅吾豈敢或可效知音

其二

春日邢臺上獨吟千古愁鼓行人自失磬折爾何求宦

恐詩名忌才寧更事收西來書一紙吾病欲全瘳

送張職方謫判鎮江

畫室宵衣切公車畫草頻論兵人自勝飛捷事誰真放
逐容明主艱危失大臣還應伏波幕書記禮崔駰

其二

郡閣憑揚子公餘試一臨江山百戰色南北異時心敵
恐矜天慙誰當任陸沉艱難根本地相贈淚沾襟

止酒

物色何縻至窮愁忽蛻興此生甘磊砢吾黨讓憑陵天
地驕相束風雲黯自仍降心堪入社絕口羨如渾

其二

豈不卑醒態其如惜病何衰顏漁父對白眼酒人過世
事窮堪老詩篇倚更多春來空爛漫吾計獨蹉跎

竺上人六月閉關禪誦精進書此勉之

聞師初解夏一鉢與繩牀幡影白雲靜鐘聲清晝長霞
餐有禪悅水觀生微涼請看降心後依然花草香

其二

維摩丈室外苔蘚自經旬豈以薰脩業能堅忍辱身覓
心不可得縛汝竟何人好去門前路清溪漲色新

初夏游張氏山亭

豈必在丘壑居然無俗塵曲肱烏皮几墊角白綸巾萬
象各有媚孤雲愈見親野人驟得此野性詎能馴

其二

叢林鳥雀傲委巷漁樵通迴看一卷石坐失千華嵩藤

蘿行秋色檜栢宿天風投足豈在廣會心浩無窮

其三

微微動幽籟
簌簌滌廣除
石梁屬窅窱
磴道藏威紆
觴飛競謀速
飲至不願餘
無煩具主禮
已自稱吾廬

其四

改席臨幽壑
披襟當絕巔
苔錢乳竇嵌
雲葉金波穿
伏虎蘊盤攫
脩鱗坼蜿蜒
箕踞一長嘯
寒聲千樹傳

其五

宴坐盤石上澹然忘所歸片雲逗松頂隙月沾人衣
蠕蠕宿羽動稍稍澄露微尊酒欣有托塵言晤來稀

答寄子成僉事

京洛時人地蠻荒制府開楚天看欲盡朔鴈去能來
間濶將成老艱危未易才中原稀瘴癘兵甲暮堪哀

復與諸君游張氏園

休沐時相過猶言惜未頻風塵餘此地山水更何人
高咏銷蘭燼清輝掩桂輪冰盤薦沈綠不道故侯貧

其二

散地容疎放微名罷討論酒徒余漸老詩道爾誰尊抵
掌迴高睨披襟就大言狂來據盤石星斗亂堪捫

其三

不必誇幽勝唯應事事宜秋陰生檜早暝色赴花遲侍
立顏如玉爭論肉勝絲君看廣陵散何異郢中詞

其四

洗却侯家態胡牀僅薜蘿鶯花吾暫主雞黍客貪過雌

霓飛梁挂雄風岸幘多尋幽更移席興到即為歌

其五

煩暑辭高棟嚴更起麗譙坐寒雲母障詞豔雪兒調物
性幽堪狎時情短易消祇言乘月散策馬曙光搖

大雨

曜靈避晴漢豐隆鞭疾雷鰲驅海水立鵬擊天風來百
卉競含態孤根虞見摧為霖空自許板蕩世堪哀

其二

昨歲還茲日燕京雨故多縱橫成陸海簸蕩決天河日
月終無恙陰陽任自摩未須疑號令或為洗兵戈

寄曹雲南

封事人堪老長沙席未前試論驄馬客誰更碧雞天放
逐君恩並淹留國士偏南滇六月息待汝擊風烟

中庭二紅梅三月盛開賦此志感

三月梅仍發聊爭爛漫紅無能待霜暮強起受春風色
恐羣英妬枝憐幾日同吾寧載尊酒寂寞灞橋東

其二

杜曲花俱豔庭梅豔更新人看等桃杏汝自絕松筠不
語風前色多愁雨後顰那知山雪裏別有更精神

興至

興至時拈句狂吟意頗安縱稀吾輩賞不藉衆人看捲
席千山暮垂天列宿寒茫茫遠道思徙倚坐憑闌

奉寄張宇清先生

聞汝茗溪社乾坤與勝緣雲生屐齒路春挂杖頭錢碧

暈千山樹紅粧萬頃蓮探游更奇絕未許世人傳

其二

何地堪肥遯斯人自不羣杯傾若下月帆落洞庭雲煮
石青精飯臨池白練裙為郎未云貴尺素許相聞

送張汝玉郎中移病歸

送爾盧龍城秋風葭莢鳴僊曹誰玉樹御苑自金莖彩
鷁長河色踈砧野戍聲東南一抹處慘淡暮雲橫

其二

秋霜楓葉酣清淚一尊含戰鼓闌山北征帆日夜南離
情恨車馬歸計入耕蠶滿目同愁病遲歸應自慚

春日再游韋園仍用前韻

春事携尊盡清溪倚杖看山容薜荔古水氣桃花寒仗
飲扶餘醉為歡別起端如能念狂簡吾豈任簪冠

其二

身世吾今醉乾坤爾輩逢褰裳采蘭芷奏曲起魚龍返
照杯頻得浮烟闌自重莫嗔歸騎緩花底愛行蹤

醉後有感

春至偏宜醉，醉來心轉長。
看花那辨色，鬪草不成芳。
癡就終為懶，憂多轉若狂。
何時歛輕楫，隨意釣滄浪。

其二

去日未云久，征途方畏難。
客能驕白髮，身轉羨黃冠。
雨雪愁邊阻，關山戰後看。
殷勤仗一醉，莫放酒腸寬。

寄答峻伯

殷勤吳季子，尺素為予言。
春水初平雪，蘭舟直到門。
星

歸豫章駕人卧桃花源獨有新詩就誰堪細討論

未明赴公署即事

侵曉赴公署聊將餘夢辭馬蹄破殘月松影戰微颼宿
霧人語出孤燈生事知還袪在喧態嗒爾寄遐思

雪中報國寺訪張有功不遇

垂鞭叩古寺寒玉滿層柯疑是梅花發其如冰雪何嫩
人曠孤館顧我重關河忽有牟尼對諸天離思多

病甚後見舍弟至

病間吾逢弟餘生汝得兄乍驚衰後態差識變餘聲黯
淡杯仍卻踟躕燭屢更時時咎吾黨詞筆太崢嶸

送江比部視廣東學

久羨江淹筆仍扳陸賈車別懷唯爾賦新論是誰書鳩
署殘星外羊城明月初歲寒須自保鴻鴈正愁予

初秋獨游張園五首

小築謝公墅東隣習氏池野夫還一造秋暑忽何之過
雨添新瀑懸崖逗晚颼莓苔任沾濕長嘯坐支頤

其二

景物鄉心在詩篇
病骨蘇流霞散醺醺
飛雪破雕胡日
月行雙鏡乾坤自一壺
撫膺予稍適朋舊未堪呼

其三

海外戎王麥風前石國榴
火珠紅乍吐栗玉翠還浮
物自頻堪摘人勝幾度游
雕欄太平里曾是曲陽侯

其四

席綺千門月臺陰百尺松
園林私野色邸第改秋容
鹵

莽時人賞飛揚我輩逢且須拚一醉湖海戰心濃

其五

季子慕竒尚少文耽卧游生平驕爾輩端合置滄洲此
地適相遇新篇高自酬遂令林泉表時見雲霞流

答明卿

自汝移金馬風塵日更悲一身饒抗疏萬事寄論詩青
史名誰定朱絃調轉疑官情非不薄天地去何之

其二

國步羣才後天威百戰間衣冠銜寵過兵革置身艱高
議寧排闥微名且抱闕即論杯酒外何物暫開顏

立秋夕與明卿過子相

久自淹煩暑科頭興不賒相携九秋色一醉故人家節
序頻深警文章各未涯誰將宋玉辨付爾楚狂誇

其二

清尊玳瑁發高館湛盧鳴且黜人間語憑驕秋外聲異
時心競折流俗態相驚回首驅公事縱橫任兩生

時事有感

聞道三吳血猶腥大海濤運籌人自異
推轂帝頻勞白羽軍符峻黃金甲第
高普天嗟玉石吾計屈蓬蒿

其二

嬌小私相命牽衣哭路傍幾時堪
翠靨何物是紅粧暴履春風薄掖
庭秋夜長堯年如有賴微質等朝霜

送交河簿徐生

婆娑淹聖世偃蹇寄微官立馬滹
沱夕鳴琴大陸寒汝

才寧尉足古道向人難枳棘中原在風塵稍自安

夜坐

清秋思不極掩卷坐沉吟自決浮生計誰探異代心物
情窮可見吾道拙相尋不為存騷雅曹劉豈至今

秋夜

砧杵闌心甚篝燈引寐遲不才余自恕未老世頻移星
斗踈堪摘天河莽下垂喧喧漸車馬茲意欲看誰

送顧舍人使金陵還松江

汝豈因鱸膾吾魯識鳳毛青雲歸暫得白雪和誰高海
色鍾山雨秋聲笠澤濤南征有諸將為語聖躬勞

秋夜過明卿分韻

萬柝秋聲傳千門月色搖楚吟頻誚鳳吳語亂爭梟物
議安余薄時才益爾驕生平一尊酒落魄累清朝

即席分韻送肖甫

高會幾人共潸然問所之吾曹殊未已世路漸難期詞
賦雲霄潤經綸日月欺三巴還百濮姓字仗誰知

驟寒

久自安絺綌俄驚挾纈催暴雷收未穩驕霰突如其來喜
怒高天迸焦枯下土摧稍聞誇燮理吾道但堪哀

即席賦得梨分韻無字

漢廣偶萍實南中饒木奴上林還見品大谷未全無高
露屑金掌寒氷飛玉壺長卿故游倦消渴暫應蘇

月夜明卿見過遲子相不至適陸秀才之表來小

飲分韻

誰堪同夜色客有尚風塵斗酒月中醉寸心天外陳薄
游歸黯淡小語破沉淪吾眼饒青白容他禮數嗔

其二

對坐烏皮几何來白角巾詩篇寧爾道尊酒亦吾人總
未妨知己居然念所親豈應狂簡外別自有雷陳

東子與

汝去愁真宰新詩就不難豈因兵計折翻仗世途安鼎
足誰先下琴心且自彈要盟一寸地矯首薊門寒

其二

倫輩寧狂者詩篇好問之千秋何爾態萬象豈余私左
袒青雲奪中原白日垂可闕兒女計嗟惜受人悲

東子相考功

宴坐尚書省時才屈指中西來李襄國不數漢扶風名
豈緣吾大人今向爾工莫令湖海上寥廓見冥鴻

月夜報國寺明卿見訪有作

別思諸天盡臨岐但蹶然片雲依錫住殘月借燈傳施

客孟蘭飯逢僧貝葉編醉餘還更酌吾意未逃禪

贈大川上人

再從西域歸

白馬歸來後經翻定幾篇向承西竺問寧印北宗傳轉
梵天音合降心佛日偏不須尋聖諦與爾各隨緣

湖上

偶為湖上酌已異城中觴自失鳬鷺暇時來花草香更
衣報寒食立馬愛斜陽復指從西去祇園春正長

約于鱗游西山不至

就約神飛動青雲未易窺豈無堪並馬只是自吟詩物
態吾寧薄山靈爾尙知轉應疑夙昔風雨太行期

與于鱗別二三子即席分韻

不辭杯酒醉山水盡君操去住他人並行藏異代勞中
原莽星斗大陸驟風濤尙有刀環色能令漢日高

贈呂光化

遇爾何稱病淒然自越吟五噫明世事三刖盛年心故
舊綈袍晚文章布褐深同車有中散不惜奏瑤琴

偶成

驛使書相問愀然不可禁
吞聲微祿過削跡畏途深
主父千金口龍陽百歲心
野人何所道歸釣楚江陰

詠鷹

時有感趙司空也

羣族寧妨汝睢盱動殺機
決雲尋嗜去驚電逐呼歸
風雨扶衡擊乾坤縱飽飛
亦知終鼎俎辛苦為誰肥

余以使事出至薊門時事大變明卿被謫

豈謂邊陲遠風光到自嗟
帝京新世事郎署舊天涯
傲

骨窮堪長狂名晚更加任他車馬地風雨向人誇

其二

詩自先生事名勞異日論衆看真長物老至惜空言河
嶽西來轉星辰北望尊爾曹知有盡那可不銷魂

其三

除目無勞問時才滾滾過積薪吾意遠推轂物情多不
盡青雲色何來大海波故園有叢桂憐爾正婆娑

其四

倏忽精靈變浮生未可幾向知愁貝錦誰復記牛衣雨
露寧榮悴風雲各是非斐然二三子戒爾盍言歸

答子相考功

變後書相問倉皇拭淚看物情殊恍忽吾道轉艱難蜂
目無勞睨蛾眉敢自安熒熒夜光在莫使照人寒

子與有使事賦此問之

汝屈辭官計猶銜奉使榮但仲明主法無害小臣名風
雨驕難問江河幸未爭獨餘愁病客春色老邊城

明卿由給事外謫貽書見報悵然有答

恠爾緣狂謫書來轉更狂一官任湖海十口厭文章後
進吾俱畏浮名衆亦妨不須歌九辨春雪滿三湘

漁陽有懷于鱗却寄

春郊望不盡飛動意難禁地轉漳流濶山連薊日深安
危吾長物貧賤爾初心薄俗寧無畏高齋且細吟

其二

莫問除書意風塵彼一時折腰君自若執掌我何辭客

計深憐晚詩名未易卑吳門耦耕地烽火受人疑

聞諧

薄諧元非假高名敢遽攀未歸慚地下

謂容城也

且住看人

間湖海藏烽色雲霄遁客顏五噫何敢咏揮手出燕關

其二

故舊紛相謂狂名得已遲卿仍用卿法吾更愛吾詩枉
責元龍禮虛勞惠子疑吳山青片片或恐妬歸期

驟雨

急雨至無賴高風吹未停蒼茫歸一氣歛忽走千靈禾
耳不愁黑麥芽無限青乾坤應自若其奈入沈冥

弔故李北平廣

聞道匈奴騎猶驚飛將鋒馬蹄終自老猿臂欲誰封得
一中原重無雙異代容長令草間鏑霜色滿盧龍

偶成

戰地窮胡粵謀臣出漢廷亂離人厭日踈放客能星祿
薄憑相棄歌深且自聽中山酒太惡三載又勞醒

懷柔道中

馬足吾何限山行稍自寬
人家梅雨色衣袖麥秋寒
過瀑添新徑歸雲改故壑
斷腸沙鴈起一一向長安

宿昌平寺中

招提西郭外邀我暫披襟
一雨汰行色諸天迴住心
僧來探小品吾欲老叢林
莫問津梁意人間道路深

弇州四部稿卷二十五